

📖 আদর্শ বিবাহ ও দাম্পত্য

বিভাগ/অধ্যায়ঃ বিবাহ ও দাম্পত্য বিষয়াবলী

রচয়িতা/সঙ্কলকঃ আবদুল হামীদ ফাইযী

ইদত

স্বামী তালাক দিলে স্ত্রী ইদত পালন না করে দ্বিতীয় স্বামী গ্রহণ করতে পারে না। এতে স্বামী-স্ত্রীকে বিবাহ-বিচ্ছেদের ব্যাপারে পুনর্বিবেচনা করতে সুযোগ দেওয়া হয়। ফলে সেই সুযোগে স্ত্রী প্রত্যাণীতা করতে পারে। তাছাড়া ইদত বিধিবদ্ধ করায় এ কথার ইঙ্গিত রয়েছে যে, বিবাহ কোন ছেলেখেলার বিষয় নয়। এর আগে-পিছে রয়েছে বিভিন্ন নিয়ম-নীতি ও সীমা-সময়।

পরন্তু ইদতের মাঝে নারীর গর্ভাশয় পরীক্ষা হয়। যাতে দুই স্বামীর তরফ থেকে বংশের সংমিশ্রণ না ঘটে।

তালাকপ্রাপ্ত নারী যদি অরমিতা হয় বা তার বাসরই না হয়ে থাকে, তবে তার কোন ইদত নেই।[1]

রমিতা মহিলা যদি ঋতুমতী হয়, তবে তার ইদত তিন মাসিক; তিন মাস নয়। সুতরাং সম্ভাবনাকে দুধ পান করাবার সময় যদি ২/৩ বছরও মাসিক না হয়, তবে তিন মাসিক না হওয়া পর্যন্ত সে ইদতেই থাকবে।[2]

ঋতুহীনা কিশোরী বা বৃদ্ধা হলে তার ইদত তিন মাস।[3]

কিন্তু ইদত শুরু করে কিছু দিন পরে তার ঋতু শুরু হলে, ঋতু হিসাবেই তাকে তিন ইদত পালন করতে হবে।[4]

কোন জানা কারণে মাসিক বন্ধ থাকলে বা হবার সম্ভাবনা না থাকলে তার ইদতও তিন মাস। কিন্তু হবার সম্ভাবনা থাকলে ফিরে আসা পর্যন্ত অপেক্ষা করে তিন মাসিক ইদত পালন করবে। অবশ্য যদি অজানা কারণে মাসিক বন্ধ থাকে তাহলে ১ বছর অর্থাৎ গর্ভের ৯ মাস এবং ইদতের তিন মাস অপেক্ষা করে তবে দ্বিতীয় স্বামী গ্রহণ করতে পারবে।[5]

গর্ভবতীর ইদত প্রসবকাল পর্যন্ত।[6]

মাস অথবা মাসিক হিসাবে ইদত শুরু করার কিছু দিন পর গর্ভ প্রকাশ পেলে প্রসবকাল পর্যন্তই অপেক্ষা করতে হবে।

তালাকপ্রাপ্ত মহিলা তার তালাকের খবর তিন মাসিক পর পেলে তার ইদত শেষ। আর নতুন করে ইদত নেই।[7]

খোলা তালাকের ইদত এক মাসিক। মাসিকের পর দ্বিতীয় স্বামী গ্রহণ করতে পারে।[8]

অনুরূপ স্বামী মারা গেলে বিরহবিধুরা বিধবা স্ত্রীকেও ইদত ও শোকপালন করতে হবে। (সূরা আল-বাক্বারা (২) : ২৩৪)

এতে স্ত্রীর গর্ভাশয় গর্ভ থেকে খালি কি না তা পরীক্ষা হবে; যাতে বংশে সংমিশ্রণ না ঘটে। তাছাড়া এতে স্ত্রীর নিকট স্বামীর যে মর্যাদা ও অধিকার তার অভিব্যক্তি ঘটে।

সুতরাং বিধবা গর্ভবতী হলে প্রসবকাল পর্যন্ত ইদত পালন করবে। (আর তা ২/১ ঘন্টাও হতে পারে।) অতঃপর

- সে ভিন্ন স্বামী গ্রহণ করতে পারে। তবে গর্ভবতী না হলে ৪ মাস ১০ দিন অপেক্ষা করে ইদত পালন করবে।[৭]
- বিধবার বিবাহের পর বাসর না হয়ে থাকলেও ঐ ইদত পালন করবে। যেমন, নাবালিকা কিশোরী অথবা অতিবৃদ্ধা হলেও ইদত পালন করতে হবে।[১০]
- রজয়ী তালাকপ্রাপ্তা স্ত্রী (ইদতে থাকলে; যাকে স্বামী ফিরিয়ে নিতে পারে) তার স্বামী মারা গেলে নতুন করে স্বামী-মৃত্যুর ইদত পালন করবে।[১১]
- কোনও কারণে ইদতের সময় পিছিয়ে দেওয়া যায় না। স্বামীর মৃত্যুর পর থেকেই ইদত পালন শুরু করতে হবে।[১২]
- স্বামীর মৃত্যুর খবর ৪ মাস পর জানলে তার ইদত মাত্র ঐ বাকী ১০দিন। ৪ মাস দশ দিন পর জানলে আর কোন ইদত নেই।[১৩]
- ইদতের ভিতরে বিধবার শোকপালন ওয়াজেব। এই শোক পালনে বিধবা ত্যাগ করবেঃ-
- ১- প্রত্যেক সুন্দর পোশাক। তবে এর জন্য কোন নির্দিষ্ট ধরনের বা রঙের কাপড় নেই। যে কাপড়ে সৌন্দর্য নেই সেই কাপড় পরিধান করবে। সাদা কাপড়ে সৌন্দর্য থাকলে তাও ব্যবহার নিষিদ্ধ।[১৪] নির্দিষ্টভাবে কালো পোষাক ব্যবহারও বিধিসম্মত নয়।[১৫]
 - ২- সর্বপ্রকার অলঙ্কার। অবশ্য সময় দেখার জন্য হাতে ঘড়ি বাঁধায় দোষ নেই।[১৬] হ্যাঁ, তবে বাইরে গেলে টাইম দেখার জন্য প্রয়োজন না হলে বা রাখার মত পকেট বা ব্যাগ থাকলে হাতে বাঁধবে না। কারণ, ঘড়িতেও সৌন্দর্য আনে।
 - ৩- সর্বপ্রকার প্রসাধন ও অঙ্গরাগ; সুরমা, কাজল, যে কোন রং ইত্যাদি।
 - ৪- সর্বপ্রকার সুগন্ধি; সুবাসিত সাবান বা তৈলাদি ব্যবহার নিষিদ্ধ।[১৭]
- এমন কি নিজের ছেলেমেয়ে বা অন্য কাউকে সেন্ট জাতীয় কিছু লাগিয়ে দিতেও পারে না। যেহেতু সুগন্ধি হাতে এসে যাবে তাই।[১৮]
- অবশ্য মাসিক থেকে পবিত্রতার সময় দুর্গন্ধ দূরীকরণার্থে কিছু সেন্ট লজ্জাস্থানে ব্যবহার করতে পারে।[১৯]
- ৫- স্বামীগৃহের বাইরে যাওয়া। যেহেতু স্বামীগৃহেই ইদত পালন ওয়াজেব। তবে একান্ত প্রয়োজন বা অগত্যা (পর্দার সাথে) বাইরে যাওয়া বৈধ। যেমন, ছাত্রী বা শিক্ষিকা হলে স্কুল-কলেজ যেতে পারে।[২০] কেউ না থাকলে গরু-ছাগল, ফসলাদির দেখাশোনা করতে পারে ইত্যাদি।
- অনুরূপ স্বামীর বাসস্থানে কোন আত্মীয় না থাকলে ভয়ের কারণে কোন অন্য আত্মীয়র বাড়িতে ইদত পালন করা যায়।[২১]
- এ ছাড়া কুটুমবাড়ি, সখীর বাড়ি বা আর কারো বাড়ি বেড়াতে যাওয়া নিষিদ্ধ।[২২] এমনকি হজ্জও করতে পারে না। অবশ্য মায়ের বাড়িতে থাকা অবস্থায় স্বামীর মৃত্যু-সংবাদ পৌঁছেলে স্ত্রী সেখানেই ইদত পালন করবে।
- ইদতের সময় অতিবাহিত হলে এসব বিধি-নিষেধ শেষ হয়ে যাবে। এর পর রীতিমত সব কিছু ব্যবহার করতে পারে এবং বিবাহও করতে পারে। বরং যারা ধৈর্যহারা হয়ে ব্যভিচারের পথে পা বাড়িয়ে ‘রাঁড়ের ঘরে ষাঁড়ের বাসা’ করে তাদের পক্ষে বিবাহ ফরয।

ইদতের মাঝে বোগল ও গুণ্ডাঙ্গের লোম এবং নখাদি কেটে পরিষ্কার-পরিচ্ছন্ন থাকা, মাছ-মাংস, ফল ইত্যাদি উত্তম খাদ্য খাওয়া দৃষ্ণীয় নয়। যেমন চাঁদের মুখ দেখতে নেই, বিয়ের কনে স্পর্শ করতে নেই প্রভৃতি ধারণা ও আচার কুসংস্কার।[23]

এই বিধবা স্বামীর ওয়ারেস হবে। রজয়ী তালাকপ্রাপ্ত হলে এবং ইদতের ভিতরে বিধবা হলে ওয়ারেস হবে। বাতিল বিবাহ, খোলা তালাক প্রভৃতির ইদতে ওয়ারেস হবে না। এদের শোক পালনের ইদতও নেই। অনুরূপ তালাকপ্রাপ্ত তার ইদত অতিবাহিত হওয়ার পর স্বামী মারা গেলে ওয়ারেস হবে না। হ্যাঁ, যদি স্বামী তার মরণ-রোগে স্ত্রীকে মীরাস থেকে বঞ্চিত করার উদ্দেশ্যে তালাক দিয়েছে বলে জানা যায়, তবে তার ইদত পার হয়ে গেলেও (১ বা ২ তালাকের পর; যাতে পুনর্বিবাহ সম্ভব) ঐ স্ত্রী দ্বিতীয় বিবাহ না করে থাকলে ওয়ারেস হবে। যথানিয়মে তিন তালাকপ্রাপ্ত হলে অথবা ইদতের পর বিবাহ করে থাকলে সে আর ওয়ারেস হবে না।[24] মিলন না হয়ে স্বামী মারা গেলেও স্ত্রী ওয়ারেস হবে।[25]

ফুটনোট

- [1] (সূরা আল-আহযাব (৩৩) : ৪৯)
- [2] (সূরা আল-বাক্বারা (২) : ২২৮, ফাতাওয়া ইবনে উসাইমীন ২/৭৯৯)
- [3] (সূরা আল-আহযাব (৬৫) : ৪)
- [4] (ফিকহুস সুন্নাহ ২/২৯৭)
- [5] (ফাতাওয়া ইবনে উসাইমীন ২/৭৯৯)
- [6] (সূরা আল-আহযাব (৬৫) : ৪)
- [7] (ফাতাওয়া ইবনে উসাইমীন ২/৮০৪)
- [8] (ফাতাওয়া ইবনে উসাইমীন ২/৭৯৯)
- [9] (আল-বাক্বারা (২) : ২৩৪)
- [10] (মাজাল্লাতুল বহসিল ইসলামিয়াহ ১৬/১১৪,১২০,১৩২)
- [11] (ফাতাওয়া ইবনে উসাইমীন ২/ ৮২০)

- [12] (মাজাল্লাতুল বহসিল ইসলামিয়াহ ২/৮১৫, ফাতাওয়াল মারআহ ৬৫পৃঃ)
- [13] (ফাতাওয়া ইবনে উসাইমীন ২/৮০৪)
- [14] (মাজাল্লাতুল বহসিল ইসলামিয়াহ ১৯/১৫৮)
- [15] (ফাতাওয়াল মারআহ ৬৫পৃঃ)
- [16] (মাজাল্লাতুল বহসিল ইসলামিয়াহ ১৯/১৫৮)
- [17] (ফাতাওয়া ইবনে উসাইমীন ২/৮১৩)
- [18] (কিতাবুদ দাওয়াহ ২/১৪৩)
- [19] (লিকাউল বা-বিল মাফতুহ, ইবনে উসাইমীন ২৪/১৩)
- [20] (মাজাল্লাতুল বহসিল ইসলামিয়াহ ১৬/১৩১)
- [21] (মাজাল্লাতুল বহসিল ইসলামিয়াহ ১৯/১৬৮)
- [22] (তামবীহাতুল মু'মিনাত ১৫৪পৃঃ)
- [23] (তামবীহাতুল মু'মিনাত ১৫৪-১৫৫ পৃঃ)
- [24] (ফাতাওয়া ইবনে উসাইমীন ২/৮২০, কিতাবুদ দাওয়াহ ২/২০৫, ফাতাওয়াল মারআহ ৯৭-৯৮)
- [25] (ফাতাওয়া ইবনে উসাইমীন ২/৮২১)

Source — <https://www.hadithbd.com/books/link/?id=3718>

হাদিসবিডির প্রজেক্টে অনুদান দিন